

# **BARAZA LA WAWAKILISHI ZANZIBAR**

Simu Nam. + 255 24 2230602/1  
Fax Nam. + 255 24 2230215  
Tovuni: [www.zanzibarassembly.go.tz](http://www.zanzibarassembly.go.tz)



**SANDUKU LABARUA 902,  
ZANZIBAR**  
Barua Pepe: [zahore@zanlink.com](mailto:zahore@zanlink.com)

## **HOTUBA YA MAONI YA KAMATI YA KUSIMAMIA OFISI ZA VIONGOZI WAKUU WA KITAIFA KUHUSU MAKADIRIO YA MAPATO NA MATUMIZI YA OFISI YA MAKAMU WA PILI WA RAIS, SERA URATIBU NA BARAZA LA WAWAKILISHI KWA MWAKA WA FEDHA 2022/2023**

---

### **Mheshimiwa Spika,**

Naanza kwa kumshukuru Mwenyezi Mungu Mwingi wa Rehma kwa kutujaalia uzima nna afya njema na kuweza kukutana hapa katika kikao hiki muhimu kwa maendeleo ya nchi yetu kwa lengo la kujadili bajeti mwaka 2022/2023 kwa maendeleo ya nchi yetu. Aidha, nachukua fursa hii adhimu kumpongeza Mheshimiwa Dk. Hussein Ali Mwinyi, Rais wa Zanzibar na Mwenyekiti wa Baraza la Mapinduzi kwa kutuongoza, kutuelekeza na kusimamia ipasavyo utekelezaji wa majukumu ya Serikali kwa mujibu wa Katiba na kama ilivyoainishwa katika Ilani ya Uchuaguzi ya Chama Cha Mapinduzi ya Mwaka 2020 – 2025, MKUZA III na Mipango mikuu ya Maedneleo kwa Taifa letu.

### **Mheshimiwa Spika,**

Napenda kukushukuru wewe binafsi kuweza kunipatia nafasi hii mbele ya Baraza lako tukufu kuweza kuwasilisha maoni ya Kamati yangu ya Kusimamia Ofisi za Viongozi Wakuu wa Kitaifa juu ya utekelezaji wa Bajeti

kwa Ofisi ya Makamu wa Pili wa Rais, Sera, Uratibu na Baraza la Wawakilishi kwa mwaka wa fedha 2022/2023.

**Mheshimiwa Spika,**

Napenda pia, kuchukua nafasi hii kuipongeza Ofisi ya Makamu wa Pili wa Rais, Sera, Uratibu na Baraza la Wawakilishi inayoongozwa na Mhe. Hamza Hassan Juma pamoja na kumpongeza yeye binafsi kwa uteuzi alioupata hivi karibuni, watendaji wote wa Ofisi hii wakiongozwa na Katibu Mkuu wake, Ndg. Thabit Idarous Faina kwa utendaji mzuri wa kazi zao na ushirikiano mkubwa wanaoipatia Kamati hii katika kutekeleza majukumu yake. Hata hivyo, napenda kuishukuru Ofisi hii kuweza kuwasilisha mbele ya Baraza lako tukufu bajeti ya yao kwa mwaka 2022/2023 ikiainisha vipaumbele vyote ambavyo msingi wake ni kuleta maendeleo chanya katika nchi yetu.

**Mheshimiwa Spika,**

Vile vile, pongezi za dhati kabisa ziende kwa wajumbe wa Kamati yangu kwa kazi nzuri wanayoifanya na ushirikiano wanaouunesha kwa pamoja katika kutekeleza majukumu ya kazi zetu kwa muda wote, naomba sasa niwatambue wajumbe hawa kama ifuatavyo:-

- |                              |                   |
|------------------------------|-------------------|
| 1. Mhe. Machano Othman Said  | Mwenyekiti        |
| 2. Mhe. Mtumwa Peya Yussuf   | Makamu Mwenyekiti |
| 3. Mhe. Suleiman Makame Ali  | Mjumbe            |
| 4. Mhe. Zaina Abdalla Salum  | Mjumbe            |
| 5. Mhe. Mohammed Mgaza Jecha | Mjumbe            |
| 6. Mhe. Salma Mussa Bilal    | Mjumbe            |

Aidha, Kamati hii inaratibiwa kazi zake na makatibu wawili pamoja na mkalimani mmoja wa lugha za alama ambao wanatusaidia kutekeleza majukumu yetu kitaalamu na kiufanisi, Makatibu hao ni:-

- |                                  |   |            |
|----------------------------------|---|------------|
| 1. Ndg. Ali Alawy Ali            | - | Katibu     |
| 2. Ndg. Mwanaisha Mohammed Kheir | - | Katibu, na |
| 3. Ndg. Amina Abeid Hemed        | - | Mkalimani. |

**Mheshimiwa Spika,**

Baada ya utangulizi huo naomba sasa kutoa maoni ya kamati yangu kwa Ofisi ya Makamu wa Pili wa Rais, Sera, Uratibu na Baraza la Wawakilishi kwa bajeti hii kwa mwaka 2022/2023 kama ifuatavyo:-

**Mheshimiwa Spika,**

Ofisi ya Makamu wa Pili wa Rais, Sera, Uratibu na Baraza la Wawakilishi yenye mafungu matatu (03) ambayo ni Fungu C01 Ofisi Kuu, fungu C02 Baraza la Wawakilishi na fungu C03 Tume ya Uchaguzi, Mafungu haya yanaendeshwa kwa progaramu Kuu na ndogo ambazo zimo katika kila mfungu husika kama zilivyoainishwa katika hotuba ya mheshimiwa Waziri na kitabu cha Bajeti kuu.

**Mheshimiwa Spika,**

Utekelezaji wa Program hizi umezingatia Mipango Mikuu ya Kitaifa ikiwemo Dira ya Maendeleo ya Zanzibar (2050), Ilani ya Uchaguzi Mkuu ya CCM ya mwaka 2020 – 2025, Mpango wa kukuza uchumi na Kupunguza Umaskini

Zanzibar (MKUZA III), Malengo ya Maendeleo Endelevu (SDGs)2025, Ahadi zilizotolewa na Mhe Rais Dkt Hussein Ali Mwinyi, Rais wa Zanzibar na Mwenyekiti wa Baraza la Mapinduzi katika kipindi cha kampeni za Uchaguzi, Hutuba na maagizo ya Mheshimiwa Rais ambayo anayatoa kila anapopata fursa ya kufanya hivyo.

**Mheshimiwa Spika,**

Katika fungu C01; Kupitia program kuu ya ***Uratibu wa Shughuli za Serikali:*** Kamati inaipongeza Idara ya Sherehe na Maadhimisho ya Kitaifa pamoja na kuwaenzi viongozi wa kitaifa kwa kusimamia vyema malengo yake na kuhakiksha yanaenda kama yanavyopangwa. Hata hivyo, kwakuwa Idara hii imepangiwa kukusanya mapato jumla ya Tsh. 75,252,000/- kupitia vyanzo vyake, Kamati inashauri kuongeza juhudhi katika kuviboresha vyanzo hivyo ikiwemo milango ya maduka ya Mwanakwerekwe ambayo ni michakavu na haiendani na wakati na mazingira husika.

**Mheshimiwa Spika,**

Aidha, Kamati inashauri jengo hili kuvunjwa na kujengwa upya ili kukidhi mahitaji ya kibiashara lakini pia, kuongeza wigo wa ongezeko la mapato. Kamati pia, inashauri Idara ya Sherehe kununua vifaa vipya na vya kisasa ambavyo vitaweza kuwaingizia mapato pamoja na kutumika katika hafla mbali mbali za kiserikali na kijamii.

**Mheshimiwa Spika,**

Kama tunavyofahamu kuwa suala la maafa katika jamii haliweazi kuepukika bali tunaweza kukabiliana nalo tu wakati linapotokea ili

kupunguza athari za moja kwa moja kwa jamii. Kaupitia program ndogo ya SC010201 Kukabiliana na Maafa; Kamati yangu inashauri Idara katika kutoa huduma na misaada ya maafa kuwepo uwiano ulio sawa katika jamii kwa kuzingatia jiografia ya maeneo mahususi.

**Mheshimiwa Spika,**

Kamati inaipongeza Serikali kwa kuanzisha mradi wa Kuimarisha Uwezo wa Kujilinda na kukabiliana na maafa ambapo kwa mwaka huu umepangiwa jumla ya Tsh. Milioni 459.14 kama hatua mbadala ya kupambana na maafa Zanzibar. Sambamba na hilo, Kamati inaishauri Serikali kuanzisha kampeni maalumu ya kuanzisha mfuko wa kukabiliana na maafa Zanzibar kwa kuzingatia sheria na kanuni za maafa ambazo zinatumika kusimamia majanga mbali mbali katika nchi yetu,

**Mheshimiwa Spika,**

Kupitia Programu ndogo ya *Shughuli za SMZ* ambayo imepangiwa jumla ya Tsh. Bilioni 31.59 ambazo zitatumika pia kupitia Mradi wa TASAF III kwa upande wa Zanzibar, Kamati inazipongeza Serikali zetu zote mbili, Serikali ya Mapinduzi ya Zanzibar na Serikali ya Jamhuri ya Muungano wa Tanzania kwa kuzidi kutenga fedha kwa ajili ya kuendesha mradi huu ambao unazisaidia sana jamii zetu katika kupunguza hali ngumu ya umasikini.

**Mheshimiwa Spika,**

Hata hivyo, kupitia programu hii Kamati inashauri zoezi la usajili wa wanufaika au walengwa wa mradi huu kuzingatia sifa na vigezo vyta ya mradi

kwa maeneo yote ya vijijini ili kuépusha malamiko na matumizi mabaya ya fedha bila kufikiwa malengo. Ni imani ya Kamati yangu kwamba fedha zilizotengwa kwa mwaka huu wa fedha zitafikia malengo ya TASAF III na wananchi wataweza kunufaika kwa pamoja.

**Mheshmiwa Spika,**

Kupitia programu hii, Kamati yangu inaelekeza kwamba Miradi mikubwa ya **OPEC** ambayo inatekelezwa Tanzania Bara na imewanufaisha katika nyanja mbali mbali ya kimaendeleo, Kamati inashauri Serikali kupitia Idara ya Uratibu wa SMZ kutafuta njia muafaka za kuona ni namna gani Zanzibar nayo inanufaika na Miradi hiyo kwani ipo miradi mikubwa ambayo inahitaji kutekelezwa.

**Mheshmiwa Spika,**

Kwa upande wa Baraza la Wawakilishi yenye fungu C02, kupitia programu ndogo ya SC020201 Uongozi na Utawala wa Baraza la Wawakilishi, Kamati imefarajika sana kuona jinsi mipango na mashauri mbali yanavyotekelawa siku hadi siku na hivyo kupelekea kuimarika kwa dira na malengo ya Baraza hapa Zanzibar na nje ya Zanzibar. Aidha, Kamati inashauri mpango wa ununuzi wa magari kwa ajili ya shughuli za Kamati uweze kusimamiwa na kutekelezwa kwa wakati kwani bado changamoto ipo katika suala zima la usafiri kwa Kamati za Baraza.

**Mheshimiwa Spika,**

Kamati yangu ya Kusimamia Ofisi za Viongozi Wakuu wa Kitaifa inaipongeza Tume ya Uchaguzi Zanzibar kwa kazi zake nzuri na zenye

manufaa kwa mustakbali wa kukuza demokrasia Zanzibar. Hata hivyo, Tume ya Uchaguzi Zanzibar inakabiliwa na changamoto ya vyombo vya usafiri katika ofisi zake zote za Unguja na Pemba na hivyo kulazimika kuazima magari kutoka Taasisi mbali mbali za Serikali. Kamati inashauri, Serikali kuiangalia kwa moyo wa huruma Taasisi hii muhimu katika nchi yetu ili kuipunguzia changamoto ambazo zinakwaza maendeleo yao.

## **HITIMISHO**

### **Mheshimiwa Spika,**

Kamati inaiomba Ofisi ya Makamu wa Pili wa Rais, Sera, Uratibu na Baraza la Wawakilishi kuhakikisha wanasimamia vyema ukusanyaji wa mapato kupitia vianzio vyao vilivyopo ili kuweza kuongeza ufanisi katika kazi zao na mapato kwa Serikali.

### **Mheshimiwa Spika,**

Aidha, kupitia Bajeti hii ya 2022/2023 Kamati inaishauri Serikali kuingiza fedha kwa wakati ili Taasisi zilichini ya Ofisi hiiziweze kutekeleza majukumu yake kwa ufanisi na kukamilisha malengo yaokwa mwaka huu kwa maendeleo ya wananchi na Nchi kwa ujumla. Kwani, kucheleweshwa kwa fedha za matumizi mengineyo kunapelekea watumishi kutolipwa stahiki zao mbali mbali wakati ni haki zao kisheria.

### **Mheshimiwa Spika,**

Mwisho kabisa, ili kufikiwa malengo waliyojipangia katika utekelezaji wa majukumu yao; Ofisi ya Makamu wa Pili wa Rais, Sera, Uratibu na Baraza la

Wawakilishinakwa niaba ya Kamati hiitunawaomba Waheshimiwa Wajumbe wa Baraza lako Tukufu waichangie na wairidhie Bajeti hii na hatimae wapitishiwe mapato na matumizi ya fedha zote zilizopangwa kwa Wizara hii kwa mwaka wa fedha 2022/2023.

**Mheshimiwa Spika,**

*Kwa niaba ya Kamati yangu **Naomba Kuunga Mkono Hoja.***

Ahsante,



(Machano Othman Said)

**MWENYEKITI,**

**KAMATI YA KUSIMAMIA OFISI ZA VIONGOZI WAKUU WA KITAIFA**

**BARAZA LA WAWAKILISHI,**

**ZANZIBAR**